

Gjesdal Senterparti - kommuneprogram 2019 - 2023



Senterpartiet sitt verdigrunnlag

Senterpartiet vil byggja samfunnet nedanfrå. Me vil arbeida for eit samfunn der menneske kan utvikla seg fritt. Samfunnskontrakta skal oppfyllast av myndige menneske som tar ansvar for eige liv, for fellesskapet og for naturen. Senterpartiets verdigrunnlag er den kristne og humanistiske kulturarva. Kvart menneske er unikt og uerstattelig, og menneskeverdet er ukrenkeleg og overordna andre verdiar.

<https://www.senterpartiet.no/politikk/verdigrunnlag>

Nær folk i Gjesdal

Senterpartiet meiner at respekten for menneskeverdet og einskildmennesket sin ukrenkelegheit må være grunnleggjande for alt politisk arbeid. For Senterpartiet er kort avstand til dei som fattar avgjerslene, openheit om dei slutningane som blir tekne og nærheit til dei tenestene ein skal tilby innbyggjarane, grunnleggjande for at samfunnet skal fungere på ein god måte.

Gjesdal Senterparti meiner at det er kort avstand frå innbyggjar til politikar i Gjesdal. Det er ein verdi det er viktig å ta vare på.

Gjesdal kommune gir tenester med gjennomgåande høg kvalitet. Gjesdal Senterparti vil utvikle dei kommunale tenestene i Gjesdal i takt med dei behova som oppstår i kommunen. Gjesdal kommune strekk seg langt - både for lokalsamfunnet, innbyggjarane og dei tilsette.

Klimaendringar - behov for lokal handlingar

Menneskeskapte klimaendringar skapar allereie store utfordringar på ulike samfunnsområde. Utfordringane vil høyst sannsynleg bli større i tida som kjem. Klimaendringane er summen av mange einskildhandlingar som blir gjort lokalt, og derfor vil også handlingar me gjer lokalt bidra til å bremsa klimaendringane. Gjesdal Sp meiner at alle må ta eit ansvar for å bidra til redusera utsleppa av gassane som påverkar klimaet. Gjesdal Sp meiner og at samfunnet, offentlig og privat, gjennom si planlegging må ta høyde for konsekvensane av eit endra klima. Dette har me løfta i inneverande periode ved å få nye innkjøpsreglar for kommunen der ein legg meir vekt på klima og kortreiste varar.

Gjesdal Senterparti vil:

- ha ein framtidsretta, miljøvennleg energiproduksjon.
- ha levande bygder og grøne tettstader med gode nærmiljø og varierte fritidstilbod.
- at Gjesdal kommune skal etablere fleire ladepunkt for elbil i heile kommunen.
- støtta landbruket og framheva beitedyr sin positive innverknad på landskapet.
- greia ut mogleikane for å byggja biogassanlegg.
- seie nei til både nye og utvida vindkraftsøknadar.

Kommunereform

Regjeringa hevdar at kommunereformen på langt nær er over, og truleg må administrasjonen også i denne perioden bruka ressursar på denne prosessen, ressursar som kunne ha kome våre eigne innbyggjarar til gode. Gjesdal er ein akkurat passe stor kommune og klarer seg fint ved å samarbeide med kommunane rundt om dei større oppgåvene.

Gjesdal Senterparti er imot tvangssamanslåing av kommunar.

- Gjesdal kommune skal også i framtida styrast frå Ålgård.
- Eventuelle samanslåingar må skje etter fleirtal i folkeavstemming.

Gjesdal kommune - ein attraktiv arbeidsplass!

Gjesdal kommune er ein stor organisasjon med mangfaldige oppgåver. Gjesdal kommune løyser oppgåvene sine på ein god måte fordi dei kring 900 tilsette gjer ein god jobb. Gjesdal Senterparti meiner det er viktig at medlemmane av kommunestyret er bevisst rolla si som arbeidsgjevar.

Kommunen jobbar etter ein smart city-strategi som forpliktar oss til å redusera negative miljø- og samfunns-påverknader, auka effektiviteten ved å ta i bruk smart-teknologi og styrka muligheita for innbyggjarane, næringslivet og frivillige aktørar til i fellesskap å bidra til utvikling av og i kommunen.

Gjesdal kommune ønskjer å satsa på å utvikla ein heiltidskultur. Det skal forbetre kvaliteten for den einskilde brukaren og skape ein meir framtidsretta og effektiv organisasjon. Men det vil også føre til at ein legg til rette for eit godt arbeidsmiljø og til at den einskilde tilsette får føreseielege råmer å forhalda seg til.

Rekruttering av arbeidstakarar med relevant kunnskap er viktig for at Gjesdal kommune skal løyse oppgåvene sine på best mogleg vis. Ei godt fungerande lærlingordning er sentral for å rekruttera framtidige dyktige tilsette til Gjesdal kommune. Gjesdal SP vil prioritere eit framleis høgt inntak av lærlingar i Gjesdal kommune.

Gjesdal Senterparti vil:

- sørga for arbeidstreningstilbod til dei funksjonshemma i kommunen, inkl transport.
- auka grunnbemanninga for å redusera utgifter til sjukefråvær.
- at Gjesdal kommune skal ta imot fleire lærlingar, spesielt frå helsefaget.
- jobba for å redusera uynskja deltid gjennom fleire heiltidsstillingar.
- Ikkje gjennomføra privatisering av kommunale tenester.
- gjennomføra tiltak som gjer at arbeidstakarane vel å forsetta i jobb framfor å ta ut AFP.

Skule, heim og familie

Senterpartiet ser på familien som grunnsteinen i samfunnet. Senterpartiet meiner ein sterk fellesskule er viktig. I eit stadig meir mangfaldig samfunn er gode, felles møtearenaar viktige, og barneskulen er kanskje den viktigaste møteplassen.

Barn og unge har rett på ein trygg kvardag - fri for mobbing og vald. Trivsel og tryggleik er grunnleggjande føresetnader for læring. Senterpartiet vil arbeida hardt for å bekjempe mobbing. Målet er at alle elevar skal trivst i skulen så dei kan utnytta potensialet sitt for læring og utvikling. Eit framtidretta samfunn er tidleg ute og gir barna innsikt i samfunns- og arbeidsliv. Gjesdal kommune har tidleg innsats og førebyggjande arbeid blant barn og unge som satsingsområde.

Gjesdal Senterparti vil:

- styrka kvaliteten i skulen, m.a. ved hjelp av fleire lærarar og fagfolk.
- at lærarnormene skal gjelda på klassenivå
- ha fortgang i rehabiliteringa av Oltedal skule og ombygginga av Dirdal skule.
- ha variert barnehagetilbod med store og små barnehagar, og fleksibelt opptak.
- ha tidleg innsats for å kunne tilpassa opplæring og undervisning til den enkelte eleven.
- ha utvida samarbeid mellom skule og næringsliv, for meir opplæring i praktiske fag.
- ha god integrering og organisering av tilbodet til framandspråklege elevar.
- ha trygge skuleveggar i heile kommunen. Bru over kanalen frå Ålgård skole til Ålgård Bedehus, og sti frå Solbakkane til Solås.
- styrka mobbeombodet.
- at bemanningsnormen i barnehagar skal gjelda heile dagen
- auka grunnbemanninga for å redusera utgifter til sjukefråvær

Næringsliv

Landbruk, industri og anna næringsliv er sjølve livsgrunnlaget for våre lokalsamfunn. Gjesdal har fleire attraktive industriområde, med Skurve og Opstad som beste eksempel.

Næringslivet i Gjesdal er variert, men felles er at det er langt framme i innovasjon og teknologi, både i landbruket og ellers. Mange av desse har kome seg så langt ved hjelp av kommunal støtte, og det er viktig for ein kommune å ha jamn kontakt med næringslivet.

Gjesdal Senterparti vil:

- ha utbygging av allsidig næring, og styrka det eksisterande næringslivet i heile kommunen.
- vidareutvikla lokale reiselivsprodukt og lokal matproduksjon.
- ha sterkare vern av matjord, og difor tilbakeregulera landbruksområde frå tidlegare prosesser.
- seia nei til sundagsopne butikkar.
- støtta bobilparkering nær sentrum.

Helse- og omsorgstenester

Gode helse- og omsorgstenester er viktige berebjelkar i det gode lokalsamfunnet. Gjesdal Senterparti set livskvalitet og menneskeverd i høgsete. For Senterpartiet er det viktig at alle i kommunen har tilgang til dei same tenestene uavhengig av kor ein bur, og me ynskjer derfor at ein ser på gjenopning av helsestasjonane og legekontor i Oltedal og på Gilja.

Psykisk helse er noko alle har og er påverka av. Halvparten av Noregs befolkning vil i løpet av livet koma til å slita med psykiske plager. Dette rammer først og fremst den det gjeld, men også dei pårørande og samfunnet forøvrig. Helsesystemtilbodet er viktig her og må styrkast i kommunen, og aller helst bør alle elevar få tilbod om ein samtale slik at terskelen for å spørja om hjelp vert senka.

Gjesdal Senterparti vil:

- ha fleire sjukeheimsplassar og omsorgsbustader med stor fleksibilitet.
- at det nye Åboaskvartalet vil ha eit mangfald av tenester, inkl. kjøkken på sjukeheimen.
- styrka tilbodet til dei sjukaste eldre i bygdene, og bygge opp under satsinga på heimebaserte tenester.
- gjenopna helsestasjonane og legekontora i Oltedal og på Gilja
- innføra omsorgsløn og fast avlasting til dei som har hovudomsorg for pleietrengjande heime.
- styrka det førebyggjande helsearbeidet, m.a. med eit godt friluftstilbod.
- ha vidare satsing på diakon og frivillig innsats.
- styrka helsesystemtilbodet på barne- og ungdomsskulane.
- styrka den kommunale jordmortenesta, i heile kommunen.
- styrka arbeidet med psykisk helse i kommunen.
- auka tilbodet om rehabilitering med fysioterapi og ergoterapi.
- auka grunnbemanninga for å redusera utgifter til sjukefråvær.
- ta imot fleire lærlingar frå helsefaget.

Bustadpolitikk

Gjesdal Senterparti ynskjer lys i stovene rundt om i heile kommunen. Det er viktig for trivsel og helse at det er naboar rundt ein som ser ein og kan hjelpe til.

Kommunen skal vera ein aktiv bustadbyggjar og tilby attraktive og rimelege alternativ for fyrste- og sistegongsetablerarar, og dei som ellers slit med å komma seg inn på marknaden.

Gjesdal Senterparti vil:

- etablera varierte kommunale tomter på uproduktiv jord.
- ha ein meir fleksibel ordning for startlån.

Samferdsel

Store vegprosjekt er på gang gjennom Gjesdal. E39 Hove-Skurve og tverrsambandet mot Jæren er dei viktigaste. Desse er viktige for Gjesdal, men har blitt forsinka på grunn av lang planlegging og usikkerheit rundt finansieringa. Her må ein få fortgang. E39 sørover frå Skurve er under planlegging, men dette prosjektet har stoppa opp i departementene. Me forventar og at her vert det framgang i perioden. E39 Ålgård-Lyngdal er ein statleg veg, eit statleg prosjekt med statleg plan, og me forventar og at staten har ansvar for finansieringa, og difor også ansvar for å eventuelt bestemma bompengetakstar langs denne strekninga.

Gjesdal Senterparti vil:

- ha fullt trykk på arbeidet med firefeltsveg Hove – Skurve.
- komma rask igang med tverrsamband mot Jæren.
- ha betre kollektivtilbod i heile kommunen og heile Gjesdal inn i sone Nord-Jæren.
- jobba for gjenopning av Ålgårdbanen.
- jobba for naudsynte oppgraderingar av vegnettet i Frafjord og på Gilja.
- auka tilskotet til private vegar, og betra vedlikehaldet av dei kommunale vegane.
- ha 100 % mobil- og breibanddekning i heile kommunen.

Kultur

Ved nyttår 2020 flyttar kulturskulen inn i nye, flotte lokale i Veveriet. Dette er eit viktig tiltak som Senterpartiet stod bak i forrige periode. Her vert det og plass til ungdomskafé, storsal og mykje anna. Dette vert eit godt supplement til biblioteket, som er ein av dei viktigaste arenaene i ein kommune, både som møteplass og institusjon.

Idretten har ein veldig viktig rolle i kommunen, og bidreg til både fysisk aktivitet og samhald. Senterpartiet er stolt av å levera på løfte om ny idrettshall og fotballhall som snart står ferdig i Gjesdal Idrettspark. Dette vil vera positivt for både bredde- og toppidretten i kommunen. Gjennom samarbeidet med Gjesdal Idrettsråd har kommunen kome i gong med Folkepulsen, og me håpar at dette kan bidra til at fleire grupper, og spesielt inaktive, kjem i aktivitet.

Kommunen står føre store utfordringar når det kjem til vedlikehald av kyrkjene våre. Både Dirdal og Gjesdal har store behov som vil bli veldig kostbare.

Gjesdal Senterparti vil:

- styrka ungdomstilbod i heile kommunen, med ungdomshus og tiltak der ungdommen sjølv har eigarskapet og ideane.
- ha gode vilkår for frivillig lagsarbeid.
- ha kunstgrasbane i Dirdal.
- ha betre vedlikehald av kyrkjene.
- starta arbeidet med ein fleirbrukshall i Oltedal.
- starta arbeidet med ein ny, sentrumsnær symjehall.
- ha eit mangfaldig fritidstilbod for alle innbyggjarar.
- innskrenka bruken av fyrverkeri gjennom året.

Beredskap

Stadig fleire er uroa for beredskapen i Noreg. Når naudetatane har fått svekka si lokale forankring og større avstandar skal betene, kjenner mange seg usikre på om dei vil få hjelp og bistand i tide dersom ulykker skjer og dei treng blålystenester.

At landmakta i Noreg er redusert, svekker både nasjonal tryggleik og lokal beredskap.

Den såkalla «nærpolitireformen» har ført til den sterkaste sentraliseringa av politiet som noen gong er gjennomført i Noreg. Gjesdal mista sitt politikontor, og middel har vorte omfordelte. Dette har ført til ei auka byråkratisering, som har gjort at saksbehandlingsfristar vert overskridne.

Gjesdal Senterparti vil:

- styrka beredskap og samband i Frafjordtunnelen.
- ha flaumsikring i heile kommunen.
- utarbeida ein beredskapsplan for skog- og lyngbrann

For meir lesing

Meir av politikken finn du her:

Fylkestingprogram for Rogaland Senterparti 2019-2023, der vidaregåande skular, fylkesveggar og regional utvikling er viktige tema:

<https://www.senterpartiet.no/lokallag-og-fylkeslag/rogaland/fylkestingsvalet-2019-programmet>

Senterpartiet sitt program for 2017-2021, som inneheld partiet sitt verdigrunnlag og vår overordna politikk:

<https://www.senterpartiet.no/politikk/vedtatt-politikk/program/senterpartiets-program-2017--2021>

Anna vedteke politikk, som uttalar frå landsmøte og fylkesårsmøte:

<https://www.senterpartiet.no/politikk/vedtatt-politikk>



*Me tek heile
Gjesdal i bruk!*

Senterpartiet